

Titus

Pahati

Assalamu Aleykum Warahmatullahi Taala Wabarakatuhu. Saga juran itu min Kitab Injil maka leh nulat leh dikayuh wakil Al-Masi nionan si Paul. Ya ábey pabayaan-na dikayuh sasohoan Tuhan ábangsa Grik nionan si Titus. Íya tu dikayuh ámeyah ma Al-Masi maka bey nabang ma si Paul magnasihát ma दौर Epesos maka ma púh Kriti. Ley peen siga magnasihát ma púh Kriti, niyah saga aa ley magkahagad ma amanat-siga. Hangkan na pag tulak si Paul, ley soho-na niambanan miili si Titus supaya manduh maka matottog iman saga jamaa. Toggol-toggol iya miilu, ley iya nipabayaan sulat itu leh si Paul panabang ma hinang-na maka pamakosog pangateyan-na. Ya sulat si Paul tu asal min panduh maka min kahandak Rú Allah. Hangkan na makatabang du sab ma kitabi, sagannap ángadjih min ikhlas pangateyan-na.

Na mura-murahan bang peen nirahmatan sagannap ámakabassa, maka nibuwanan leh Tuhan panghati ma Palman-na.

Jud 1

Panalam

¹Sulat iti min ikhlas pangateyan-ku si Paul, dikayuh sasohoan Tuhan maka wakil Al-Masi makosog pangandol saga áa ley tapeneh leh Tuhan palsukuan-na, maka mahatihan siga panduh ni kasabannalan ya na makabowa siga meyah ma kahandak Tuhan. ²Sabab niyah na agaran-tabi kasampulnaan inyawa sampey ni kasaumulan, beteh asal bey niyat maka palman Tuhan ma waktu maha gih bey pinaniyah dunya. Tuhan mba dustaan. ³Na bateh naan, ley tatuman waktu bey nipatakdil pamalahil palman-na sih*. Ati min pameneh Tuhan ya na ngalappasan kitabi, ley aku tapangandolan magnasihát amanat-na pasalan beteh ingga kitabi talappasan min hukuman kamatey.

⁴Kau lu Titus, niyat-ku dikayuh anak-ku lahasiyah ma Al-Masi. Mura-murahan kow nirahmatan maka nibuwanan kasannangan leh Tuhan ya wajib pag-mmaan-tabi, maka leh si Isa Al-Masi ya na Wakil-na Ngalappas.

*Si Isa Al-Masih nionan ma al-Kitab “Palman Tuhan”. Ndaun kitab tasulat leh si Yahiya, jud 1, ayat 1-5 maka 14-18.

Panohoan ma si Titus

⁵Na, asal kow bey soho-ku tamban ma puh Kriti, supaya tahatul-nu eyyan-eyyan maha gih bey tatangbus-ta miilu. Dikayuh hinang-nu, meneh kow ma kaniya-kaniya दौरा saga aa tahinang imam, bateh asal bey pangahaka-kul ma kau. ⁶Ya subey peneh-nu, aa maha niyah panulangan ma iya. Subey dikayuh sidja nda-na, ati saga anak-na subey mangandol du sab ma Al-Masi maka maha taonan bulaug atawa tuwas kok-siga. ⁷Sabab bang aa magnakurah ma jamaa, hati-na, iya tu tapangandolan malan kahandak Tuhan, hangkan na subey maha niyah tasulang ma addat maka ma palangey-na. Subey maha taas bowahan-na atawa panas atey-na, maha palango atawa pamonoh, maka mba du sab hawahan. ⁸Gompeen iya subey tau ngahulmat maka kosog masong kahapan. Subey hap addat maka palangey-na, bontol maka sussi pangateyan-na, maka tau nandalan napsu-na. ⁹Subey du sab tottog pagtaat-na ma amanat kasabannalan pamanduh-tabi, supaya tapamanduh-na sab ni jamaa pamakosog pagkahagad-siga. Ati bang niyah aa magpanduh anu mba bannal, tapabontol leh-na. ¹⁰Sabab heka na aa ma jamaa naggaan panduh-tabi, awla na saga aYahudi. Kabilahihan-siga kamemon jamaa subey meyah ma addat maka aturan-siga Yahudi. Maha niyah kapusan panduh-siga siddi min ngandupang. ¹¹Hangkan na subey maha na siga soho-bi manduan saga jamaa, sabab heka na amagtowteyh-anak ley tabowa-siga patá min kasabannalan. Ngkon du puhung-siga makaalah sin. ¹²Bateh bey pangahakah leh dikayuh abantug pandikal ma lahat-siga, yuk-na, “Saga amin Kriti tu dustaan, bangngis, uskowan, maka palus.” ¹³Na bannal du panaksih-na, hangkan na subey patowwaun toongan saga anaggaan panduh-ta, kalu-kalu tapabontol panghati maka pagammal-siga. ¹⁴Ati maha na paruli-siga saga pali-pali Yahudi atawa panohoan saga mundusiyah bilahi mabengkok panduh ni kasabannalan.

¹⁵Bang aa ikhlas pangateyan-na magtawbat, asal sussi sidja na iya ma pangandah Tuhan. Sugah bang maha ikhlas pangateyan-na, mbal niyah kasussihan-na. Sabab ma pangandah Tuhan, masi gih bengkok pikilan-na maka limmih pangateyan-na. ¹⁶Aa saga itu ngonan ndi-siga taptap toongan ni Tuhan, sugah ya hidjut-kahibal-siga mba magtowwah maka pangahaka-siga. Hangkan na mba katowwaan Tuhan sabab tuwas kok-siga maka maha na tapanduan tudju ni kahapan.

Jud 2

Panduh ni kasabannalan

¹Na tuwan, ya subey pamanduh-nu anu magtowwah maka panduh ni kasabannalan. ²Saga kamattoohan lalla sohoun na pinaháp addat maka palangey-siga. Subey pinatottog na maka pinabontol pamikil-siga. Iman maka sabal paluwas min pangateyan maka ikhlas ngalalahan pagkahi-siga. ³Saga kamattoohan danda sab, sohoun magmahaltabat ni Tuhan. Subey siga maha pangalimut atawa palango. Ya panduh-siga subey ni kahapan sidja ⁴supaya siga makatabang ni saga karandahan anak bahau. Ya pamanduh-siga ma saga anak bahau, subey ngalalahan anak-halla-siga, ⁵subey mba hawahan, maka addat subey hap maka bontol. Subey siga tau ngemos maka maghinang ma lumah-siga. Ati meyah gih ma garah halla-siga, supaya maha muwan kaiyaan ma Palman maka on Tuhan ya na pagtaatan-tabi.

⁶Damikiyan sab saga kalallahan anak bahau, sohoun du sab hap addat maka palangey-siga. ⁷⁻⁸Ya suntuan-siga, ya na kahinangan-nu hap ya magtowwah maka panduh-nu min ikhlas pangateyan-nu. Pahapun maka pabontolun leh-nu manduh supaya sasukuh ánggaan kau mba na makagaos ngudjuh-ngudjuh sabab maha niyah tandah kasaan-tabi.

⁹Na arapun sab saga ata, sohoun maglillah maka magmohot-mohot meyah panohoan papuh-siga maka daa nambung bang nipanduan. ¹⁰Subey siga maha nangkow, gom peen addat-siga pinahatul supaya tapangandolan. Maka supaya katowwaan mandusiyah ma panduh-tabi ma pasalan Tuhan-tabi ya na dikowh-kowh makalappas. ¹¹Sabab lai na pinalahil leh Tuhan aseh-lasa-na ni kamemon mandusiyah supaya kitabi talappasan min hukuman kamatey maka tabuwanan kasampulnaan inyawa ni kasaumulan. ¹²⁻¹³Min tabang maka aseh-lasa Tuhan, tau na kita nandalan napsu-tabi maka patá na min hinang laat. Ya subey nipalán iman ka pikilan hap maka bontol satoggol-tabi miitu ma dunya. Saltah agaran-ta llow umbul-satu, ya na llow pabalik si Isa Al-Masi ni dunya malahil kaheyahan Tuhan maka kawasa-na ngalappasan kitabi. ¹⁴Leh si Isa magmalillah baran-na tahinang pangulbanan-tabi supaya kitabi tajamin-na min paghinang kalaatan maka tahinang-na palsukuan-na sussi ya magmohot-mohot maghinang kahapan.

¹Na ya na saga itu sih subey pamanduh-nu ni saga jamaa. Asál du sab niyah kapatut-nu makosog maka mabontol pagkahagad-siga, hangkan du subey beyah-siga.

Jud 3

Heya aseh-lasa Tuhan

¹Siddi min ditu, paentomin gih saga jamaa maglillah ma panohoan saga nakurah maka ma parinta. Subey tuman-siga saga sarah, maka asál sakap sidja maghinang kahapan.

²Panduin siga mba missara laat pamakaat, gom peen miha kasulutan maka kahapan, maka magmadeyoh gih ni kamemon mandusiyah.

³Sabab minsan kita tu bang ma waktu palabey, bey du sab kulang panghati-ta maka mba bilahi maghakagad. Ya ngkon bey isbat-ta ngandulan napsu-ta maka ngahinang asál bey kabiyasaan-ta ya na makabowa kita magdusa. Bey du sab kitabi mag-imbuan maka magjingkahan, maglindi-lindihan maka ngalaat dangan ni dangan. Sampey kita ley tarupang maka maha na makatudju lan ni kabontolan. ⁴Sugah ley du pinalahil leh Tuhan aseh-lasa-na ngalappasan kitabi. ⁵⁻⁶Hati-na, min hey aseh-lasa-na hangkan kitabi ley lappasan-na, sikeyya min hinang-tabi hap. Salih kitabi bey nianakan pabíng sabab leh-na masussi na pangateyan-tabi min kawasa Ruhul-na ya na pamuwan-na min ikhlas pangateyan ni sasukuh ámeyah maka magkahagad ma Wakil-na Ngalappas, ya na si Isa Al-Masi. ⁷Hangkan na, min aseh-lasa-na niyah na kabontolan-ta ma pangandah Tuhan maka niyah gih agaran-tabi kasampulnaan ni kasaumulnan. ⁸Kamemon saga anu pangahaku tu, bannal toongan. Hangkan subey paentom-nu sidja ni saga jamaa supaya taptap siga maghinang kahapan. Sabab ya na ili saga hinang bantug maka hey kapusan-na ni kamemon mundusiyah.

⁹Halliin-bi pinagsuwal-jawaban ya maha niyah kagunahan-na, bateh na pasalan kamboh-mboan-tabi pangkat-mamangkat. Daa palamud ma palkalah atawa maglugat pasalan aturan sarah. Sabab ya paglugat bateh ili, maha niyah kagunahan atawa kapusan-na.

¹⁰Bang niyah ma diyaloman jamaa muwan lengog, subey hakaan-bi. Bang min duwa na iya nihakaan, boh mba du asip-na, patá na kam min iya. ¹¹Sabab tantu íya lu ábengkok maka baldusa. Muwanan ndi-na iya jahalah.

Kahinapusan Bissara

¹²Ná, Titus, niyah áa soho-kú piilu gantian kau, ya ka si Artimas atawa si Tikikus. Kabilahian-kú pag luun, magmohot-mohot na kow piilu tag-kú ni दौर Nikupulis. Sabab milli na patagalan-kú bang waktu pamaliyu. ¹³Arapun sab di si Apolos maka Abugaw Senas, tabangin siga makatulak pabíng maka buwanin eyyan-eyyan kagunahan-siga, ¹⁴supaya biyasa saga jamaa maghinang kahapan maka nabangan saga aa kakulangan, maka supaya niyah buddi hinang-siga.

¹⁵Salam-duwaa ni kau min seheh-kú kamemon. Pasampeyun du sab salam-duwaa-kami ni saga jamaa sagannap álasahan kami bilang danakan ma Al-Masi. Mura-murahan kam karahmatan.

Wassalam.